

Pakatan Lancar Manifesto Pilihan Raya Pada Konvensyen Januari mStar Online

**Disember 26, 2011
Oleh EMBUN MAJID**

ALOR SETAR: Pakatan Rakyat akan melancarkan manifesto untuk Pilihan Raya Umum Ke-13 (PRU-13) pada konvensyen kebangsaannya pada Januari ini.

Pengerusi PKR Kedah, Datuk Wan Salleh Wan Isa berkata konvensyen ketiga pakatan pembangkang akan diadakan pada 14 Januari di Stadium Sultan Abdul Halim, di sini.

Seramai 1,800 perwakilan dan 200 pemimpin-pemimpin dari DAP, PAS dan PKR akan menghadiri konvensyen itu, katanya.

Wan Salleh berkata Presiden PAS Datuk Seri Hadi Awang, Penasihat PKR Datuk Seri Anwar Ibrahim dan Penasihat Kebangsaan DAP, Lim Kit Siang dijangka melancarkan manifesto itu nanti.

Manifesto tersebut berdasarkan Rangka Kerja Dasar Bersama Pakatan Rakyat (Buku Jingga), kata beliau dalam sidang akhbar di sini hari ini.

Wan Salleh juga berkata manifesto itu juga akan diagihkan kepada mereka yang menghadiri majlis pelancaran itu.

Apabila ditanya mengenai kemungkinan Anwar tidak menghadiri konvensyen itu berikutan keputusan Mahkamah Tinggi pada perbicaraan kes liwatnya yang akan diberikan pada 9 Januari, Wan Salleh berkata ini tidak akan menjejaskan tumpuan parti.

"Walau apa pun keputusannya, ia tidak akan menjejaskan momentum parti. Kami akan terus bekerja keras untuk parti," katanya.

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/12/26/mstar_berita/20111226155125&sec=mstar_berita